

Buna sira! Buna sira me cari siuri!

Anche ist'ani, ringrasonda u Signur, a suma rivà a Nadal; cun ist a l'è u 60/mo Nadal ad Gilindu, 60 ani, forse i son pochi per l'età d'in omi, ma per na rapresentasiòn cus ripet tücc j'ani, semper medesima i son propi tòncc. U sarrà perchè a l'è na rapresentasion facia an cà a la boina; a l'è d'origine controllata però; u sarà perchè tücc j'ani cula sonta masnà, c'la turna a nasi ant cula cöina, um fà nasi la speronsa ad'pudei di anche noi (pover uataron) na parola ad pas ed ben a tüt la gent ad boina voluntà, c'la continua a vnim a vighi.

60 ani! ista cumemurasion, u l'avreisa facia molto pù ben el cumendatur Arnoldi, ma u Signur u j'à dicc: "Domenico - a ven vègg anche mei, ai sent meia pù cme na vota, venimla a di chi an Paradis, a la sent pù ben"; acsei quondi is Padron ut ciama in piasì, us pò nent dij ca d'no.

Eh! la me cara gent, a suma entrà antl'era du telefono, a l'ura di past tuta la Nasion a l'è an linea cun la Raffaella Carrà; el mari i son an testa; i mondu el masnà in avanscoperta: "No - mi dispiace - non è Cappucetto Rosso" - "Non importa Raffaella, ti passo la mamma" e la mamma ui n'amporta propi gnente ad vensi i getton, a l'è la sudisfasion ad senti la so vus, an diretta T.V., urbi et orbi. Anche u telegiornale u taja cört; chi se ne frega du Libano, d'la mafia, ad Regan, u j'è d'andvinè quoncc fasulèn da l'ogg u j'è an tel baratul.

An sel television privaji l'è pes ancora; it fon telefonè per gl'iasti di quader, gl'iasti dl'antiquariato. Ier sira i'uffrivu in crucefis talment antich, cu risaliva al "300 avanti Cristo"! Us telefuna a la chiromante, anveci ad lesi la mon, la les la vus du teleutente. Ansüma ad tücc i canal ui ven fora la scricia: "Telefonateci! Telefonateci!"

Anche el radio liberi ormai i fon tüt per telefono, el dedichi del canson: "Ti voglio bene" di Branduardi da Cicci di Voghera a Maria di Pietramarazzi; el ricèti d'la chiseina; us po' pù telefonè privatament, i telefoni i son semper ocupà.

S'us pudijsa almenu, c'me ca favu na vota, scambiès el nutisii per lëtra, anche chì us po pù; la Posta l'è bela antasaia ad cartuleini per i concorsi-quiz. Eh! i feisu almenu di quiz difencil, a so nent: "Se cl'ha dicc Pietro Longo an tu so ùltim intervento a la Camera?" Al masim ui part 2 cartuleini; la soua e cula du so segretari particular. Anveci si canteisu "l'Italia

s'è desta, dell'elmo di... s'è cinta la testa" ui part 57 milion ad "Scipio" cul francubul.

La cinematografia l'è an crisi, au cinema ui v'è pù poca gént: quondi, per cunbinasion ui na v'è ben jèn, j'anfilu in filon ch'el finis pù: El Padrino parte prima, el Padrino parte seconda, terza, quarta: i l'ha finisu pù.

Ades vist u suces cl'ha avì fra i giuvu "Il tempo delle mele" anche la tersa età la nent ausì esì da menu: Paola Borboni, Wanda Osiris, Carlo Dapporto, i ston registronda per la terza rete "Il tempo di pum-cocc".

A suma an crisi, prosegue la corsa del dollaro, el minister Visentini l'ha prupost ad fei la mülta per eccesso di velocità! Cus dollaro ch'el va semper sü, a s'ampinuma ad debit; cui chi studiu, el testi feini, ion dice che ogni masnà c'la ven al mond, la sà 8 milion ad debit. Da chi andè a'nòn per i lieti eventi i dirròn "Eccezionale parto trigemellare ad Ova-da: la signora Rossi ha dato alla luce 24 milioni di debiti".

Tücc i govern i son pù c'me fè a stupè i bogg, tücc i sercu ad fè sü di sold; Gheddafi l'ha ciamà a l'Italia i danni di guerra per la prima guerra punica.

An tüt el mond, nent ammac an Italia, u s'è scatenà la caccia all'evasore fiscale: an Israele per esempi, j'on cità a giudisi j'eredi ad Giuda Iscariota; u smeia, che per cul famus tradiment l'aba ciapà 80 denari, e nent 30 cme clava dichiarà.

A genar i presi al consumo i son aumentà dell'1,2%, a giugn del 2,3%, a dicember del 3,2%; a suma sudisfacc, almenu na roba l'è nent aumentà: la virgola! Anche el potere d'acquisto dla lira da trei ani l'è nent cambià: trei ani fà cun na lira us crumpava propi gnente du tüt, propi cme adès.

U smeia che per tampunè i debit ad l'INPS, vist che l'età media d'italion a l'è ad 63/ani, el pension i c'mensu a pagheji da 65/ani an sù. Anche la formula per avei la pension minima l'è cambiaja, l'è pù 19 ani, 6 meis, 1 dì, ades a l'è: 19 ani per sbruiè la pratica, 6 meis per vighi i prüm sold, 1 dì per spendia. Pensè ca juma di minister: ion us ciama Forte, in'ater Altissimo, in'ater Signorile; s'na truvuma jèn cus ciama Bravo a suma a post.

Noi a juma semper da cupiè da l'America: u smeja che anche ch'è an Italia a bütu sü la statua d'la Libertà, la nostra però i la ciamu "Statua d'la Libertà pruvisoria".

Se po' jën el po nent avei la libertà pruvisoria, u j'è semper j'arresti domiciliari an sità, al mar, an muntagna; se po' l'ha t'nì na boina cunduta, per el ferii i poru dei j'arresti domiciliari an su Yot. Se po' jën, scarugnà al masim, el po nent avei j'arresti domiciliari, la libertà pruvisoria, u j'è semper u trasferiment an cuc ospidal, an cuca clinica; ansi u smeja fina che per fè pü prëstu, per nent perdi tu temp, j'arresti i fasu fè diretament da d'immfermé.

L'America! L'America per pudei fè entrè i negri an t'el parlament la duvì pensei Abramo Lincoln; da noi per fè entrè Toni Negri an t'el parlament u j'è bastà in Pannella qualunque...

Uarduma però ad nent ammac reji e sghignasè: pensuma anche a tûta la gent che ant'el mond, an Italia - pensuma a cula povra gent du trenu - i devu pasè in Nadal pèn ad dular e ad tristësa; preguma perchè cula Santa Masnà ui daga a lur la forsa ad superè sti mument brüt e a cul "bestji" la pusibilità ad capì tüt el mà ch'j'on facc. Bestji, con cul ch'j'on facc u j'è el pericul d'ufendi el bestji.

Adess, prüma ad fei aveii del groini a sti bravi Frà l'è mei ca la pionta lei, se no a son pü long du telegiornale: av present la me famija...

